



## АЗАМАТТАР ОДАҚ ЖҰМЫСЫНАН НӘТИЖЕЛЕР КҮТЕДІ

**Президент Қасым-Жомарт Тоқаев Еуразиялық экономикалық одаққа мүше мемлекеттер үкіметтерінің басшыларымен кездесті. Бұл туралы Ақорданың баспасөз қызметі хабарлады.**

Мемлекет басшысының айтуынша, бүгінгі кездесу геосаяси ахуалдың өте қатты ушығып тұрған кезінде өтіп жатыр.

— Біздің экономикалық одағымыз белгілі себептерге байланысты санкциялық қарсылықтардың салдарынан туындайтын саяси текетірестердің күшеюіне және оның елдеріміздің экономикасы мен қаржы жүйесіне кері әсеріне алаңдаушылық білдіреді. Валюта бағамына, төлем жүйесіне, екінші деңгейлі банктерге қатысты тәуекел-қатерлер күшейе түсті. Біз Қазақстанда дағдарысқа қарсы шаралар қабылдап жатырмыз. Бұл тек басы ғана, алда өте күрделі жұмыстар тұр. Бұл жұмыстарды Еуразиялық экономикалық одақ аясындағы әріптестерімізбен келісе отырып жүргіземіз деп ойлаймын. Экономикалық, қаржылық және өнеркәсіптік жүйелердегі тығыз ықпалдастықты ескере отырып, тәуекел-қатерлерді бағалауға және жағдайдың кері әсерін төмендетуге бағытталған экономикалық шараларды әзірлеу үшін жұмыс тобын құру керек, — деді Президент.

Қасым-Жомарт Тоқаев қаржы реттеушілерін қатыстыра отырып, экономикалық ведомстволар деңгейіндегі аталған жұмыс тобын ұйымдастыруды ұсынды. Үйлестіру жұмыстарын Еуразиялық экономикалық комиссия өз қолына алуға тиіс. Оның пікірінше, сыртқы макроортадағы күрделі жағдайға қарамастан, Еуразиялық экономикалық

одақтың экономикалық көрсеткіштері оң қарқын көрсетуде.

— 2021 жылдың қорытындысы бойынша одақтың сыртқы саудасының өсімі 34 пайыздан асты, ал ішкі сауда көлемінің өсу көрсеткіші одан да жоғары, яғни 67 пайызға жетті. Бұл — Еуразиялық одақтың ішкі сауда-экономикалық байланыстарының нығайғанын білдіретін жақсы көрсеткіш. Ішкі жалпы өнімнің жиынтық өсімі — 4,4 пайыз. Бұл болжанған көрсеткіштен едәуір жоғары. Өзара сауда-саттықты кеңейту, экономика салаларындағы бәсекеге қабілеттілікті арттыру жөніндегі бағытымыздың дұрыс екеніне қуаныштымын, — деді Мемлекет басшысы.

Қасым-Жомарт Тоқаев Еуразиялық үкіметаралық кеңестің күн тәртібі өте тығыз екенін атап өтті. Оның пікірінше, барлық мәселе, соның ішінде өте өзекті проблемалар жемісті әрі табысты талқыланды.

Кездесу барысында Еуразиялық экономикалық одаққа мүше мемлекеттер үкіметтерінің басшылары еуразиялық интеграцияның қазіргі және перспективті мәселелері жөнінде пікір алмасты.

Премьер-министрлердің сөзін тыңдаған Қазақстан Президенті соңғы оқиғаларға байланысты ауқымды жұмыстар атқару керек екенін атап өтті.

— Елдеріміздің үкіметтері аса күрделі проблемаларды шешудің тиімді жолдарын табуға тиіс. Бұл өте маңызды. Еуразиялық экономикалық одақтың жұмысынан зор нәтиже күтеміз. Біз бар күш-жігерімізбен және еңбегімізбен мемлекеттеріміздің стратегиялық мүдделеріне сай келетін Еуразиялық экономикалық одақтың абыройы мен беделін сақтауымыз қажет. Шын мәнінде, азаматтарымыз бұл одақтан нақты нәтижелер күтеді, — деді Қасым-Жомарт Тоқаев.



## РЕСЕЙ ПРЕМЬЕРІН ҚАБЫЛДАДЫ

**Мемлекет басшысы Еуразиялық үкіметаралық кеңеске қатысу үшін Қазақстанға келген Ресей Федерациясының Премьер-министрі Михаил Мишустинді қабылдады. Бұл туралы Ақорданың баспасөз қызметі хабарлады.**

Кездесу барысында олар сауда-экономикалық, инвестициялық ынтымақтастықты, соның ішінде Еуразиялық экономикалық одақ аясындағы ықпал-

дастықты нығайтуға баса мән бере отырып, Қазақстан мен Ресей арасындағы стратегиялық серіктестікті дамытудың перспективаларын талқылады.

Сонымен қатар Қазақстан Президенті мен Ресей Премьер-министрі Украинадағы жағдайдың ушығуына және Ресейге халықаралық санкциялардың енгізілуіне байланысты екі мемлекет арасындағы тауар айналымының төмендеуіне жол бермеу жөніндегі бірлескен шараларды қарастырды.

## Екі ел арасында ашық саяси диалог бар

**Қасым-Жомарт Тоқаев Еуразиялық үкіметаралық кеңестің отырысына қатысу үшін Қазақстанға келген Арменияның Премьер-министрі Никол Пашинянмен келіссөз жүргізді. Бұл туралы Ақорданың баспасөз қызметі хабарлады.**

Кездесу барысында олар сауда-экономикалық байланыстарды, Еуразиялық экономикалық одақ аясындағы ынтымақтастықты нығайтуға баса назар аударып, Қазақстан мен Армения арасындағы қатынастардың даму перспективаларын қарастырды. Тараптар халықаралық ұйымдар аясындағы өзара іс-қимылдар мен Украина

төңірегіндегі жағдайды талқылады. Мемлекет басшысы Армения Премьер-министріне ілтипат білдіріп, екіжақты ынтымақтастықтың қарқынды дамып келе жатқанын атап өтті.

— Быыл біздің дипломатиялық қатынастарымыздың орнағанына 30 жыл. Бұл — өте маңызды дата. Екі ел арасында жоғары деңгейлер-

дегі ашық саяси диалог жолға қойылған. Парламенттік, мәдени-гуманитарлық байланыстарымыз дамып келеді, — деді Президент.

Өз кезегінде Армения Үкіметінің басшысы қонақжайлық көрсеткені және Еуразиялық үкіметаралық кеңес отырысының жоғары деңгейде ұйымдастырылғаны үшін алғыс айтты.

## Қос мекеме басшысын таныстырды

**Қ.Тоқаев жаңадан тағайындалған Ішкі істер министрі мен Сыбайлас жемқорлыққа қарсы іс-қимыл агенттігінің жаңа төрағасын таныстырды. Бұл туралы Ақорданың баспасөз қызметі хабарлады.**

Мемлекет басшысы Қасым-Жомарт Тоқаев Ішкі істер министрлігінің басшылық құрамымен кеңес өткізіп, Ерлан Тұрғымбаевты Ішкі істер министрі қызметінен босату және Марат Ахметжановты ведомство басшылығына тағайындау туралы Жарлықтарға қол қойғанын хабарлады.

Президент қаңтар оқиғасы кезінде арандатушылар мен радикалды күштердің соққысына бірінші болып ішкі істер органдарының

қызметкерлері кеудесін тосқанын атап өтті.

— Осы қайғылы жағдай ішкі істер органдары жүйесінде кемшіліктердің көп екенін көрсетті. Оны ашық айту керек. Өткен істен барынша сабақ алып, мұндай оқиғаға жол бермеу үшін барлық оқылдылықты анықтап, жою керек. Сондай-ақ қылмыскерлер мен арандатушылардың бәрін тауып, заңға сәйкес жауапқа тарту қажет. Бірақ рұқсат етілмеген тергеп-тексеру әдістеріне мүлде жол бермеу керек, — деді Мемлекет басшысы.

Ал Сыбайлас жемқорлыққа қарсы іс-қимыл агенттігінің басшылық құрамымен бейнебайланыс арқылы өткен кеңесте жаңадан тағайындалған төраға Олжас Бектеновті таныстырды.

Мемлекет басшысы агенттіктің жаңа төрағасы мен жеке құрамына сыбайлас жемқорлық қылмыстары үшін жауапкершіліктен жалтарып кетпеуді қамтамасыз етуге, қоғамда сыбайлас жемқорлыққа төзбеу идеологиясын күшейтуге, мемлекеттік қызмет туралы қоғамдағы жағымсыз пікірді өзгертуге бағытталған бірқатар міндет жүктеді. Сонымен қатар Президент елден ұрланып кеткен активтерді қайтаруға ерекше назар аудару керек екенін айтты.

Мемлекет басшысы 2022-2026 жылдарға арналған сыбайлас жемқорлыққа қарсы саясаттың жақында бекітілген тұжырымдамасын қалыптасқан ахуалды сапалы өзгертудің маңызды құрамдас бөлігі ретінде атап өтті.

## Мемлекеттік аудитті дамытуды тапсырды

**Мемлекет басшысы Есеп комитетінің төрағасы Наталья Годувананы қабылдады. Президентке комитет төрағасы Республикалық бюджеттің атқарылуын бақылау жөніндегі есеп комитетіне берген тапсырмаларының орындалуы туралы баяндады.**

Қасым-Жомарт Тоқаевқа 2021 жылы жүргізілген аудиторлық және сараптамалық-талдау жұмыстарының негізгі қорытындылары туралы мәлімет берілді. Былтыр жалпы 32 триллион теңгеден астам бюджет қаражаты бойынша 155 нысанға 21 аудиторлық тексеру жүргізілген.


Наталья Годунова Мемлекет басшысының тапсырмаларын орындау аясында квазимемлекеттік секторға жүргізілген аудиттің аяқталғанын, арнаулы экономикалық аймақтардың қызметіне, жер ресурстарын басқару жүйесіне, Токиодағы Олимпиада ойындарына дайындыққа және панде-

миямен күреске бөлінген қаражаттың тиімді жұмсалыуына бағалау жүргізілгенін хабарлады.

Кездесу қорытындысы бойынша Президент жана экономикалық саясатты іске асыру және мемлекеттік аудит жүйесін дамыту аясындағы Есеп комитетінің қызметіне қатысты бірқатар нақты тапсырма берді.

## ФОРСАЙТ: келешекті болжау және жоспарлау

Оқиғалар жылдам өзгеретін уақытта бізді келешекте күтіп тұрған жайттарды білгіміз келеді. Алайда болашақты болжау оңай емес. Айтып отырғанымыз ішкі және сыртқы саясат, экономика, білім мен инновация. Әрине, бұл салада құмалақ ашпайсың. Ғылыми әдістер бар. Соның бірі — форсайт. Егер аталған әдіс-амалды елде қолдана алсақ, келешекке дайын бола аламыз ба?



Дәл бүгін елдегі, әлемдегі жағдаяттарды болжау қиын. Процестер жылдам жүре бастағандай. Болып жатқан оқиғалардың нәтижесін білгісі келетіндер көп, бірақ болжау әдістері бар ма? Олар сапалы ма? Сенуге бола ма? Сан сауалдан нақты мысалдарға көшейік. Жыл сайын Ақмола облысындағы Атбасар секілді бірнеше ауданда өзендер тасып, су басады. Былтыр Үкімет су тасқынының салдарын жою үшін 160 млрд теңге бөлді. Биыл да Төтенше жағдай министрлігі су басу қаупі жоғары аймақтарды атады. Ендеше осы шығынды азайтудың, алдын алудың жолы бар ма?

Немесе басқа бір мысалды алайық. Ресей армиясы Украинаға басып кірді. Соғыс ашты. Батыс елдері Ресейге санкция жариялады. Санкцияның «салқын самалын» Қазақстан да сезді. Рубльдің бағамына тығыз байланған теңге бір күнде құлдырап, құны 1 долларға шаққанда 470 теңгеге дейін жетті.

(Жалғасы 5-бетте)

## Шағын отбасын шетке қағудан не ұттық?

Қазақстанда шағын отбасылар қамқорлықтан қағажу қалды. Мұны сарапшылар да, былайғы жұрт та жиі айтып жүр. Бірақ Үкімет ел пікірін елемегенімен қоймай, жас ұрпақтың бір бөлігін кемсітіп отырғандай: айталық, егер сәби шағын отбасыда дүниеге келсе, мемлекет оның күтіміне ай сайын небәрі 17 мың теңге шамасында жәрдемақы береді. Егер бала көпбалалы отбасында туса, ай сайынғы күтіміне мемлекет бөлетін қаржы бірден 4,3 есеге артады! Дискриминациядан қажыған кейбір шағын отбасы, соның ішінде қазақтар «ана капиталын» беретін Ресейге көшіп жатыр.

### КӨП ҚОРҚЫТАДЫ...

UNICEF ұйымы балалы отбасыларға арналған әлеуметтік көмек жүйесін талдауында бір жайтқа назар аударғалы: Қазақстанда халықтың басын өсіріп отырған шағын отбасылар екен. Мәселен, 2012 жылы республикада 240 мыңдай отбасы көпбалалы саналыпты. Содан бері бақандай он жыл өтті. Көпбалалы отбасылар саны тек екі еселенген: Еңбек және халықты әлеуметтік қорғау министрлігінің дерегінше, 2022 жылғы қаңтардағы жағдай бойынша елімізде 487,6 мың көпбалалы отбасы бар. Заң бойынша отбасыда 4 және одан көп көмелетке толмаған бала ата-анасымен бірге тұрып жатса, ол отбасы «көпбалалы» мәртебесін иеленеді. Сарапшылардың бағалауын-



ша, бұл отбасыларда шамамен 2,5 миллионға жуық көмелетке толмаған бала тәрбиеленіп жатыр. Қалғаны есейіп кеткен. Бұл ретте заң бойынша осы төртеудің қатарында 23 жасқа дейінгі күндізгі

бөлім студенті де есептеле береді. Бірақ 1—17 жас аралығындағы жасөспірімдер ғана «бала жасына» жататыны мәлім.

(Жалғасы 4-бетте)



## Сенат төрағасы Италия елшісімен кездесті

Парламент Сенатының Төрағасы Мәулен Әшімбаев Италия Республикасының Қазақстандағы Төтенше және өкілетті елшісі Марко Альбертимен кездесті.

Кездесу барысында Мәулен Әшімбаев Қазақстан Президенті Қасым-Жомарт Тоқаевтың елді жанарту саясатын іске асыру аясында қолға алынған әлеуметтік-экономикалық және қоғамдық-саяси бағыттағы шараларға тоқталып өтті.

Тараптар екі ел арасындағы ынтымақтастықты арттыру мәселесіне назар аударып, бұл ретте парламентаралық байланысты нығайту да маңызды екенін тілге тиек етті.

«Біздің елдеріміздің заң шығару органдары арасындағы қарым-қатынас серпінді дамып келеді. Оған екі елдің парламенттерінде жұмыс істейтін достық топтары берік негіз болып отыр. Екі жақтың да мүдделі мәселелер бойынша осы топтардың әлеуетін тиімді пайдаланғаны маңызды. Сондай-ақ Қазақстан депутаттары ЕҚЫҰ Парламенттік Ассамблеясы, Еуропа кеңесі Парламенттік Ассамблеясы және Парламентаралық одақ аясында Италия пар-

ламентшілерімен көпжақты байланыстарды дамытуға мүдделі», – деді Мәулен Әшімбаев.

Италияның Қазақстандағы елшісі де екі елдің парламентаралық қарым-қатынасын арттырудың маңызды екенін атап өтті. Дипломат өз сөзінде ресми Рим Қазақстан Президенті Қасым-Жомарт Тоқаевтың қолға алған реформаларын толық қолдайтынын және оларды уақытылы шаралар деп есептейтінін жеткізді. Марко Альбертидің айтуынша, Италия Әлемдік және дәстүрлі діндер лидерлерінің съезі аясында Қазақстанның атқарып отырған қызметін жоғары бағалайды.

Сонымен қатар кездесуде инновация, білім беру және басқа да бағыттар бойынша ынтымақтастықты нығайту мәселелері сөз болды.

Сенат Төрағасы Қазақстан Парламентінің депутаттары елімізге италиялық инвестицияны одан әрі тартуға жәрдемдесуге және қажет болған жағдайда инвестициялық ахуалды жақсарту бойынша қосымша заңнамалық шаралар қабылдауға дайын екенін де айтты.

А.СҰЛТАН

## 63 миллион жымқырған қызметкер жазаланады



Өскеменде мамандандырылған балалар үйінің директоры мен бас есепшісі 63 миллион теңгені жымқырды деген айыппен сотталды.

Өскеменнің №2 соты баспасөз қызметінің мәліметінше, сот үкімі бүгін шықты. «Өскемен қаласындағы мамандандырылған балалар

үйі» КМК-да 2015-2019 жылдар аралығында балаларға бөлінген бюджет қаражатын жымқыру дерегі болғаны анықталды.

«Өскеменнің №2 соты қылмыстық істі қарауға кірісті. Бюджет қаражатын жымқыру айыптары Мамандандырылған балалар үйінің бұрынғы қызметкерлеріне – экс-директорға, бас есепшіге және кадрлар бөлімінің маманына тағылды. Олар 2015 жылдың наурызынан 2018 жылдың желтоқсанына дейін 63 миллион теңге жымқырған», – деді Шығыс Қазақстан облыстық соты төрағасының міндетін атқарушы Қайрат Шақпантаев.

Сот мәліметінше, оларға Қылмыстық кодекстің 189-бабы бойынша айып тағылды. Бұл бапқа сәйкес, айыпталушылар мүлкі тәркіленіп, 7-ден 12 жылға дейін бас бостандығынан айырылады.

А.ЖАСАНҰЛЫ

## Ресей азаматы 17 жыл заңсыз зейнетақы алған



Көші-қон қызметінің қызметкерлері заң бұзушыны Семей қаласында ұшақ билетін сатып алған кезде анықтаған. 76 жастағы облыс тұрғыны 2001 жылы қазақстандық заңнамаға қарама-қайшы екенін біле тұра Қазақстан азаматтығымен қатар Ресей Федерациясының азаматтығын алған.

РФ азаматының паспортына қол жеткізгеннен кейін ол Ішкі істер органдарына Қазақстан азаматының жеке басын куәландыратын құжаттарын тапсырмай, сол арқылы осы жолы да Нұр-Сұлтан қаласына дейін әуебилетті сатып алған. Оның үстіне, зейнет-

жасына жетіп, ол 17 жыл бойы қазақстандық зейнет-ақыны алып келген.

Қазір одан Қазақстан азаматының құжаттары алып қойылды, азаматтығынан айырылғаны тіркелді. Қазақстандық құжаттарды пайдаланғаны үшін оған Әкімшілік кодекстің 496-бабы бойынша 100 АЕК көлемінде айыппұл салынды. ШҚО Полиция департаментінің көші-қон қызметі басқа елдің азаматтығын алған жағдайда Қазақстан азаматтығынан шығуды уақытылы тіркеу қажет екенін азаматтарға ескертті.

Елдос СЕНБАЙ

## Өмір бойына жүргізуші құқығынан айырылды

Солтүстік Қазақстан облысында ішімдік ішіп, машина айдаған мас жүргізуші өмір бойына көлік басқару құқығынан айырылды. Ол бұған дейін бес жыл мерзімге жүргізуші құжатынан айырылған екен.



Ерсебулан ДҮЙСЕБОЛАТОВ (салаж)

Николай есімді азамат досымен кездескеннен кейін біраз ішіп, үйге жету үшін мас күйінде көлікке отырған. Үйге барар жолда оны жол-патрульдік полиция қызметкерлері тоқтатыпты. Медициналық тексерудің қорытындысы Николайдың «орташа» мас күйінде болғанын көрсетті. Ол Қылмыстық кодекстің 346-бабының 1-бөлігінде (Көлік құралдарын басқару құқығынан айырылған және алкогольдік, есірткілік және (немесе) уытқұмарлық масан күйдегі адамның көлік

құралын басқаруы, сол сияқты көлік құралын басқаруды осындай адамға беру немесе көлік құралын осындай адамның басқаруына жол беру) көзделген қылмысты жасағаны үшін кінәлі деп танылып, көлік құралын басқару құқығынан өмір бойына айырыла отырып, 600 сағат мерзімге қоғамдық жұмыстарға тарту түріндегі жазаға тартылды.

Н.СӨРСЕНҒАЛИҰЛЫ

## Жоғалған адамның мүрдесі табылды

Бұған дейін жоғалып кетті деп хабарланған Павлодар облысы Железинка ауданының 28 жастағы тұрғыны Дүйсеке ауылынан үш шақырым жерде өлі күйінде табылды. Тәртіп сақшылары қылмыстық іс қозғап, оқиғаның мән-жайын анықтауға кірісті. Мәйіттен азаптау белгілері анықталды.



Павлодар облыстық ПД баспасөз қызметі ер адам 14 ақпан күні хабарсыз кеткенін хабарлады. Бір аптадан кейін, Қазір Қылмыстық кодекстің 99-яки 20 ақпан күні оның мүрдесі

табылған. Аталған қылмысты жасады деген күдікке Железинка ауылының үш тұрғыны іліккен. Қазір Қылмыстық кодекстің 99-бабы, 2 бөлігі (кісі өлтіру) бойынша сотқа дейінгі тергеу жүргізілуде. Күдіктілер уақытша ұстау изоляторына қамалды.

Нұрлан СӨРСЕНҒАЛИҰЛЫ

## «Тізерлеп отырғызып ұрды»



Алматы полициясының метрополитен бөлімінің қызметкері Асыл Дүйсембеков жаппай тәртіпсіздік кезінде соққыға жығылған. Оны бұзақылар тізерлетіп, тепкінің астына алған. Бұл жағдай мегаполис көшелеріндегі бейнебақылау камерасына түсіп қалған. Бұл туралы Polisia.kz хабарлады.

«Формамды шешкізіп, өртеп жіберді. Қызметтік куәлігімді, жеке куәлігімді, қалтамда не

болды, соның бәрін тартып алды. Бөгенбай–Сейфуллин көшелері қиылысына дейін

жеткенше ұрып, сол жерде тізерлеп отырғызды», – деп әңгімеледі тәртіп сақшысы. Қаскөйлер полицейді топтың алдында тірі қалқан етіп ұстаған. Оның айтуынша, оны әріптестері құтқарып қалған.

«Әріптестеріме рақмет! Қазір сол кісілердің арқасында аман-сау тұрмын. Барлығымыздың анамыз бар. Өз баласының соққыға жығылғанын көрген оларға оңай емес», – дейді Асыл Дүйсембеков. Полицей жұмысын жалғастыруды жоспарлап отыр.

Осының алдында ІІМ Тергеу департаментінің басшысы Санжар Әділов қантардың басында елдің 11 өңірін жайлаған жаппай тәртіпсіздіктер барысында зардап шеккен 273 қызметкер, әскери қызметші ауруханала екенін, бір бөлігі жансақтау бөлімінде жатқанын хабарлады.

Ерік ЕРДЕНОВ

## Кентау қаласының әкімі ұсталды

Кентау қаласының әкімі аса ірі көлемде пара алды деген күдікке ілінді.

Алматы қаласы бойынша Сыбайлас жемқорлыққа қарсы қызмет Түркістан облысы Кентау қаласының әкімі М.Д-ға қатысты аса ірі көлемде пара алу фактісі бойынша сотқа дейінгі тергеуді бастады.

Сыбайлас жемқорлыққа қарсы қызмет Түркістан облысы Кентау қаласының әкімін әшкереледі,

ол 2022 жылғы 23 ақпанда өзінің сенімді тұлғалары арқылы мемлекеттік-жекеменшік әріптестік аясында аталған қалада автокөлік жолдарын жөндеумен айналысатын серіктестік директорынан 98 500 АҚШ доллары сомасында пара алған деген күдік бар.

Қазір күдікті соттың санкциясымен қамауға алынды. Сотқа дейінгі тергеу жалғасып жатыр.

Әбілмансұр ЖАСАН











«Күлкінің жеңбейтін дұшпаны жоқ».

Бауыржан Момышұлы

«АРА» – ара болады, шаққан жері жара болады».

Оспанхан Дүбәніров

«Күле білу – өмір, күлдіре білу – өнер, күлкі болу – өлім».

Сейіт Кенжехметұлы

# АРА



26.02.2022 ж.

«Айқынның» сатиралық қосымшасы

## БІЗДІҢ ӘКІМ ОСЫЖДАҰ!

Сіздерге бірдене айтайын. Бір қария, жасы тоқсаннан асып кетсе керек, ауырып о дүниеге кетейін, кетейін деп жатыр екен. Содан, үш баласын шақыртып алады ғой. Шал төсекте шалқасынан жатыр дейді. Кемпірі кемсеңдеп отыр дейді. Бір кезде, ол сығырайтып, көздерін ашыпты да, басын қисайтып, балаларына қарапты. Үлкені газдың, ортаншысы жарықтың баастығы екен. Кіші баласы бойдақ, үйлене қоймапты. Шал өлерінде соның жағдайын ойлапты.

Шал балаларына көздерін лақтырып жіберіп: – Балаларым, сендерге бірдене айтамын... депті. – Айтыңыз, қазір жиналысқа кетуім керек еді, дейді үлкені Бейсенбек. – Мен де асығыс едім, депті ортаншысы Жұмабек. – Ағалар, қайда асықтыңдар? деп қамығыпты кішісі Сенбек. Шал жұтынып, сөйлей алмай ұзақ жатыпты. Бір кезде, басын қисайтып: – Бірдене айтайын ба? депті.

### БІРДЕНЕ АЙТАМ

Балалары қозғалақтап, «Әкеміз не айтар екен?» деген оймен, диван үстінен түсіп, жерге тізерлеп отыра кетіпті. – Бірдене айтайын ба? депті шал тағы да әрән сөйлеп. – Айтыңыз, көке! – Айтыңыз, әке! – Шал жұтынып, бірдене айтқысы келгенімен, көздері аларып, басы сылқ ете қалады. Кемпірі анырап, шалының аяғын құшақтай жылайды. Кіші баласының көздерінен жас сорғалап, әкесінің жүрегіне құлағын тосады. Ортаншы баласының жүзінде мейірімнің үшқыны да жоқ, ұялы телефонның шұқылап отыр. Тұңғышы тымырайып қалыпты.



Әкемің жүрегі соғып тұр! дейді Сенбек бір кезде. – Су, су әкеліңдер! деп айқайлаған болды Бейсенбек. Босағала қолдарын айқастыра, қасын кере қаурап тұрған шалдың келіні, Бейсенбектің келіншегі далаға шығып кетті. Артында бір табак көже әкелді.

– Бұл не? деп сұрады күйеуі. – Көже. – Мен саған су әкел дедім ғой, су! – Адам өлерінде атауы соңғы асын ішеді деп жатушы еді... – Құрып кетші, әрі! Бір кезде, шал сығырайтып көздерін ашты. Балаларына қарады. – Әке, қалайсыз? деп жылдамсырай сұрады кіші баласы. – Есімді жоғалтып алдым ау, деймін. – Әке, жана бірдене айтамын деп едіңіз? деп жөткірінді Бейсенбекі. – Ия, бірдене айтайын ба? – Айтыңызшы? – деп өтінді ортаншы баласы. – Бірдене айтайын ба? – Ия, ия! – Бірдене айтайын дегенім... – Тез айтыңыз, а то өліп кетсеңіз. «Не айтпақ болды екен?» деп уайымдап кетеміз, – деді Жұмабегі... – Тұңғышым Бейсенбек, сен өте нашар бала болып шықтың. Әкең маған не көрсетпедің? Соның өзінде кешіріммен қарап, бірдене айтайын деп отырмын. – Мен ше? – деп қалды ортаншы баласы. – Сен де сау сиырдың боғы емессің. Інілерің Сенбекті үйлендіріңдер, көмектесіңдер. Ал, бірдене айтайын дегенім... – Бізге керекті сол ғой! деді Бейсенбекі. – Тығыш қойған қыруар ақшаның болса айтыңыз, ұялманыз, деді Жұмабегі. – Иә, бөлісіп аламыз, деді беті былық етпеген Бейсенбекі. – Бірдене айтайын ба? деді шал, бақша жақтағы қызыл алманың түбінде...

Шалдың ары қарай тілі күрмеліп, о дүниесіне жүріп кетті. Әкелерін жерлеп қайтқан соң, Бейсенбек пен Жұмабек күректерін алып, қызыл алманың түбін қаза бастайды. Жарты метр қазып болғанда, күректің ұшы бірдене шығып ете қалады. Екеуі қуанып кетеді. Әкелерінің тығыш қойған қазынасын інісімен бөліскілері де келмейді. Топырақты қолдарымен аршып қалса... Қақпағы жабылған банкі шыға келіпті. Ішінде тілдей қағаз жатыр екен. Алып оқыса, былай жазыпты: «Балаларым Бейсенбек, Жұмабек! Әшейін ойнап айтамын, тас та жоқ!» Шалдың қатыгез, мейірімсіз екі баласы сияқты, қазіргі өмірде де туған әкесін теңіретіп жіберетіндер бар екен. Сексен екі жастағы қария Амангелді Шыңғысов өз баласынан не көрмеді? Қалай үйленді, келіні жақтырмады, баласы да келінінің сөзіне еріп, отырса, опақ, тұрса, сопақ болды. Кезінде атақты «Гүлдер» ансамблінің солисі болған, одан кейін Алматыдағы Жамбыл атындағы филармонияда жұмыс істеген қария вокалдарда түнеп, қайыршылық күн кешіп жүрді. Сондағы баласының айтатыны: «Әкем ішімдік ішіп кетті». Бірақ, қария ішімдікті аузына алмайтын болып шықты. Жарайды, ішіп кеткеннің өзінде туған әкесін қалай ғана қуып шығады? «Әкең жылды болса, байлап бақ» деген аталы сөзді құлағына қыстыр-маса керек. Бүгінгінің балалары осындай енді... Олар қартаймайды...

Мұхтар МІРЕШ

Перзентхананың терезесі тұсына келген Тәңірберген айқайлады.

– Гуля!  
– Баласын емізіп жатыр! делі бір келіншек терезеден басын қылттытып.  
– Гуля!  
– Баласын емізіп жатыр дедім ғой.

– Аа, күтейін. Арада он минут өткен соң, ол тағы дауыстады.  
– Гуля!  
– Жанағы келіншек тағы көрінді.  
– Баласын емізіп жатыр!  
– Гуля!  
– Баласын емізіп жатыр дедім ғой. Не деген шыдамсыз едіңіз?  
– Балам жарты саған еметіндей, бұзау болып кеткен бе?  
– Қазір көрінеді.  
– Сіз қарызға емізе тұрсаңыз болмайды ма?

Тәңірберген ары бері адымдап, жүрді де қойды. Бір кезде, Келіншегі омырауын жауып, терезе тұсына келді. Қолын бұлғап тұрған күйеуін көріп, күлімсіреді. Күйеуінің қолында бір жапырақ қағаз, ол не болды екен?  
– Балам қалай? деп сұрады ол.  
– Балаларым де.  
– Қалай балаларым?  
– Төртеу тұдым ғой.  
– А?  
– Кеше біреуін, бүгін үшеуін.  
– А? Тағы қалып кеткен жоқ па?

– деген күйеуі қуаныштан ыржалақтай берді. Қуанышы қойнына сияр емес. Дүниеде бұдан бақытты адам жоқ шығар? Енді ше, жарық дүниеге төрт бірдей ұрпағы келіп жатыр ғой!  
– Аттарын қалай қоямыз? деп сұрады бұл. Кеше ұлының атын Аман деп қойған, телефон арқылы солай хабарлаған. Әйелі иығын көтерді. «Өзің шеш» дегені.  
– Аман, Есен, Болсынбек, Бәрібек! Сонда «Аман есен болсын,



бәрі!» болып шығады.  
– Қолындағы немене? деп сұрады келіншегі.  
– А, ия, алғыс хат қой.  
– Өзіне ме? Жұмыстан берді ме?  
– Е, жоға...  
– Кімге енді? Айтсаңыз?  
– Өзім де таң қалып тұрмын.  
– Ия?  
– Кеше дүниеге келген Аман баламызға алғыс хат жіберіпті!

– Кім?  
– Аудан әкімі!  
– Ойбай, не дейді?  
– Оқып берейін бе?  
– Оқышы?  
– «Жаңа жылдың алғашқы қонағы, қазақтың санын көбейтуші, жарық дүниеге келгеніне бір күн болған Аман Есенбайұлы аудан әкімінің Алғыс хатымен марапатталады. Аудан әкімі Мен ғой.»  
– Өлээ, мына аудан әкімі жынды шығар?

– Е, мейлі, күлген жұрт күле берсін, за то, кеше достарыммен «от души» жудық. Ал, жарайды, мен кеттім! Мен кеткен соң тағы туып жүрме. Бүгінде бала шаға асырау да оңай шаруа емес! Әкім үй береді дейсің бе?


– Кешіріңіз, Тәңірберген біздің қиялымыз. Бірақ, осыған ұқсас, адам таң қалатын оқиға өткен жылдың аяғында болды. Түркістан қаласының кішкентай бес жасар тұрғыны Азат Мадияр қала әкімі Н. Тұрашбеков атынан алғыс хат алып, айды аспанға... Жо жоқ, ой, кешіріңіз, айды аспанға шығарған ол емес, қала әкімі! Ия, тәуелсіздік мерекесі қарсаңында табысталған. Алғыс хатта былай жазылған: «Қазақстан Республикасының Тәуелсіздік күні мерекесімен құттықтай отырып, сізге саналы ғұмырыңызды Түркістан қаласының өркендеуіне, экономикасының дамуына, әлеуметтік жағдайының

өсуіне, ынтымақ пен бірліктің үйлесімді тұрақтануына және қоғамдық жұмыстарға белсене араласқаныңыз үшін шынайы алғысымды білдіремін. Егеменді еліміздің жарқын болашағы жолында еткен еңбегіңіз жемісті болсын! Деніңізге саулық, отбасыңызға амандық, бақ береке тілеймін!».

Көріңіз бе, жас бала бес жасында отбасылы болыпты, қаланың өркендеуіне керемет үлесін қосыпты! Маскара! Әкім қол қойып, мөрін басарда мәтінге қарамаған ғой! Иректетіп, қолын қоя салған. Стандарт мәтінге. Қаладағы нөмірі 27 ші мектептің даярлық тобының мұғалімі де әкімшілік атынан осындай марапатты табыс етіп тұрып, есіней беріпті... Естімеген елде көп деген осы да!

Мұхтар ШЕРІМ

## МИЛАРЫНДА МИЛЛИОНДАР



«Ми» супер маркеті ашылыпты!» деген хабар желдей есті. Еліміздің небір ақымақтары, жемқорлары мен паракорлары жалғыз ғана супер маркетке кезекке тұрғанын көргендер жағаларын ұстады. Елімізде осыншама мисыздар болғаны ма? Не деген, есек бастар еді? Шығыс Қазақстан облысы, Риддер қалалық тұрғын-үй коммуналдық шаруашылығы бөлімінің бұрынғы басшысы Қуат Мұхамедчинов супер маркетке бірінші болып кірді.  
– Қандай милар сатылуда? деп сұрады ол.  
– Есек ми, қоян ми, қасқыр ми... деді сатушы қыз.  
– Кешіріңіз, ақылды, данышпан милары сатылуда деп естіген едім.  
– Аа, «Керемет» деген ми ма?  
– Ия, сол «Кереметтен» екі кило беріңізші. Миымды ауыстырайын деп едім.  
– Кешіріңіз, таусылып қалып еді.

– Жарты кило да жоқ па?  
– Жұғыны ғана қалды.  
– Соның орнын алмастыратын қандай милар бар?  
– Тауық ми. Бірақ кімнің тарысы шашылса, сол жакка жүгіре береді.  
– Керек емес. Басқа?  
– Маймыл ми.  
– Құдай сактасын!  
– Есек ми.  
– Керекті жоқ дедім ғой! Онсыз да миым ашып кеткен, қайдағыны ойлап, мазам қашып кеткен.  
– Басқа қалмады...  
– Сау болыңыз! деген Қуат мырза супер маркеттен ашуланып шықты. Қарсы алдынан сыбайластары, «Еңбек Өскемен» республикалық мемлекеттік кәсіпорнының жетекшісі

Асхат Құдайбергенов пен «Элизор М» ЖШС нін директоры Алексей Бехтольд жолықты.

– Мұхит мырза, миым істемей қалды, деді Алексей маңдайын сипалап.

– Миымызда миллиондар, деп мінгірледі Асхат.

– Енді не істейміз?

– Мына маркетте ақылға келтіретін милар жоқ па екен? деп сұрады Алексей.

– Таусылып кетіпті.

– Олар сұрастырып жүріп, бір алыпсатардың үйіне келді. Есіктің қоңырауын Алексей басты. Үшеуін көргенде, үрейі пыр пырлап ұшып кеткен алыпсатар есікті қайта жаба қойды. Алексей қоңырауды қайта басты.

– Сіздерге не керек? деп сұрады үй иесі есіктің арғы жағынан.

Кешіріңіз, бізге ми керек еді.

– Мені ми сатады деп кім айтты?

– Оптом алып кеткен екенсіз.

– Финполдан емессіздер ме?

– Жоқ, ақымақтар едік...

– Қанша кило керек?

– Әр қайсымызға бір килодан.

– Бір кило бастарыңызға сыймайды ғой.

– Қанша қалса да беріңіз.

– Менде жарты қасық қана қалған. Оның өзі сасып кеткен...

– Үшеуі үрпісіп қалды. Мұндай ми сататын супер маркеттің жоқ екені де рас. Не істерін білмеген үшеуі ақылдаса келіп, мемлекеттің 146 миллионнан астам қаржысынан қарпып қалуды ойластырды. Қалай дейсіз ғой? Олар электр желісі құрылыс нысанын салу кезінде не бір китурқылықтарға барды.

Қуат Мұхамедчинов бас «режиссер». Миы шаршап қалса да, қылғиға салуды ойлады.

Экс шенеунік мердігер кәсіпорнынның істемеген жұмыс актісіне қол қойып, қабылдай салды. Миы қалай ғана істеп кетті десеніңізші? Супер ми! Оның кесірінен қыруар қаржы мердігерге өтіп кетті. Ал, ақтіде көрсетілген құрылыс материалдарын шайтан жалап кеткендей, жоқ! Жоба бойынша Риддерден Батыс Алтай қорығына дейін тартылуы керек электр желісі осылай тартылмады. Не деген данышпандар еді?

Ратхұм МІРЕШ







# ИНТЕРНЕТТЕ ЧЕХЕЙДІ

Түннің бір уағында, орнынан ұшып тұрған Беко жерге жата кетіп, тапаншасын пәтерінің есігіне қарай бағыттады. Есіктің қоңырауы безілдей жөнелді. Беко бұл жолы жерде ары аунап, бері аунап, тапаншасын шошандатты. Еңбектей жылжып, есікке қарай жылжыды. Есік қоңырауы тағы безілдеп еді, тез артка шегініп, отыра кетті. Залдағы кабырғада кино көрсетіліп жатты. Бір кезде, ол есікке қарай аяғын жәймен басып, жақынды бастады. Сосын:

— Бұл кім?—деп сұрады.  
— Үстіндегі әйелмін.  
— Менің үстімде неғып жатырсың?  
Түнгі он бірден асып кетті!  
— Аа, атың кім?  
— Атым жайлауда. Неғыласың?  
— Жарайды, кешір, — деген ол залға келіп, теледидарының даусын бәсеңдетті. Қызықпады білемін, келесі арнаға ауыстырып еді, шетелдің «Терминатор» киносы басталып жатыр екен.

Бір кезде, аспаннан атакты актер Шварцнеггер, терминатор секіріп түсті. Бұлшық еттері бұлтылдап, жылтырап көрінді, өзі тыр жалауаш. Жақын маңдағы барға кірді. Жігіттер мен қыздар оған таңдана қарады. Тіпті, біреуі тиісіп еді, мойнынан қылғандыра жоғары көтеріп, қарнына пышақ тыға салды. Дәу қараның кара көзілдірігін тартып алып, көзіне такты. Сосын, далаға шығып, есік



алдында тұрған мотоциклге отырды да, жөнep берді.

Беконың да, терминатор болғысы келді. Түн ортасында ол да аспаннан секіріп түсті. Аспаннан найзағай жарқ-жүрк ете қалды. Тыриған арық, аяғын да ауыртып алғаны. Сипалап қойды. Бұтына жапырақ жабыстырып алыпты. Сәл ұяты бар екен. Сосын, аксандай жүріп, жақын маңдағы шағын кафеге кірді. Ішіндегі қыз-жігіттер таңдана қарасып қалды. Бір қыз ұяла бетін алақанымен

басып, теріс қарап еді, оны жүлкі өзіне қаратып, мойнынан иіскеді. Барменге жақындаған Беко-терминатор бос бокалды сырғытты. Сыра ішкісі келгені ғой деп ойлады жүрт. Бармен түсініп, сыра құйып берді. Бірақ, ол сыра ішкен жок, беті-қолын асықпай жуып жатты. Бұл қылығына жыны келген бір жігіт талтандап, оның қасына келді.

— Ей, тырдай братан?  
— Не болды?  
— Атың кім?

— Беко —терминатор.  
Кафе ішіндегі қыз—жігіттер күлісіп алды.  
— Сен не, моншада жүрсің бе?  
Беко — терминатор он қолымен жігіттің мойнынан қылғындыра ұстап, жоғары көтерді. Жігіттің аяғы тыпырлап, жаны мұрнының ұшына келді. Өзгелер урпиісіп, кейін шегініп кетті. Беко-терминатор оны жібере салғанда, мойнын сипалаған жігіт жөтеле берді. Оның дермантин куртқасын, шалбарын киіп алды.

Дәу кара жігіт кабырғаға сүйеніп тұр екен. Өзі кара көзілдірігін шешіп бере салды. Беко-терминатор кара көзілдірікті тағып алып, есікке беттеген еді, бармен «сыраның ақшасын кім төлейді?» деп қалды. «Терминатор» жалт бұрылып, бас бармағын екі саусағының арасынан қылтитты. Сөйтті де, есік алдында тұрған мотоциклге отырып, газды барынша берді.

— Интернеттегі, вацаптағы қыздар! Қайдасыңдар? — деп айкайлады ол.

Кенет есіктің қоңырауы тағы безілдеді. Селк ете қалған Беко теледидарды өшіріп, есікке жақындады.

Ал, бұл кезде, бойжеткен айна алдына келіп, ернін қызарта бояды. Айнаға қарап, көзін қысты да, бір қырынан талтайып тұра қалды. Сосын, екінші қырынан тұрып, өзіне—өзі тамасана қарады. Мини көйлекті жабыстыра киіп алыпты. Мойнына алтынцепочкасын такты. Саусағына да алтын жүзік тағып, көз алдына апарып, жыммып қойды. Алтын сырғаларын ұстап, мөз болды. Бір кезде ұялы телефоны қоңыраулады.

— Алло, Сандуғаш?  
— Шыға берейін бе?  
— Сен шықпай—ак қой.  
— Неге? Бетімді бояп қайдым.  
— Сүрте сал.  
— Кафеге апармайтын болды ма?

— Бүгін жәй, жындыхананың жанында кездесетін болдық.  
— Неге жындыхана жанында?  
— Білмеймін.  
— Сен ол жігітті танысың ба?  
— Жооқ, вацап арқылы танысқанымызға үш күн болды.  
— Қалай, красавчик пе?  
— Ой, әнші Димаш сияқты!  
— Жолың болсын!  
Гуля сөмкесін асынып, әндете жүріп, есікке беттеді. Ал, бұл кезде, Беконың досы Жасик келген болатын.  
— Как дела? —деді досы.  
— Норм.  
— Недең қорқып жүрсің?  
— Менттер андып жүргелі кашаан!  
— Оо, жалдаған пәтерін күшті екен!

Екеуі диванға келіп отырды. Диван үстінде шашылып жатқан қыздардың суретін көрген Жасик таңданысын жасырмады.

— Блин, мына қыздардың бәрін алдап, ақшасын, алтын-дарын алып кеттің бе?

— Менің жұмысым, іс біткен сон: «Құрып кетші, әрі!». Ал мен жорыққа кеттім. Сен осы пәтерде күте тұр, жарай ма?

Сөйтті де, асығыс киінген Беко, шын аты—жөні Бекмұрат Алпысбаев пәтерінен шығып кетті. Бірақ, қайтып оралмады. Алматылық алаяқ Гулямен кездесіп, алтындарын байқатпай, сыпырып алып жатқанда, құқық қорғау органдарының қолына түсті. Тек қыз—келіншектерді алдап—арбап, несиенен ақша алдыртып, олардың сеніміне кіріп, алтындарын үлтеп кетіп, артынша жоқ болып кететін алаяқтың ақыры осымен аяқталды.

Лара РАМАН



## АЙРАН ЖАЛАЙСЫЗ БА?

— Бір шелек айран келді, айран!  
— Басеке, бұл қайдан?  
— Үкіметтен, бюджеттен,  
Халықтан қазір күй кеткен,  
Неге аларып қарайсың?  
Дейсің бе, сирак бүйректен?  
Біле білсен, әкімнің өзі,  
Маған жалауды үйреткен!  
Давай, айранға қарайық,  
Сосын бар ғой,  
Саусағымызды батырып,  
Тіпті жапырып,  
Қысқасы, қатырып,  
Айраннан бір жалайық!  
Қалғанын халыққа,  
Шығарайық, нарыққа...  
— Басеке, не ғой, немене?  
Қалғаны халыққа жете ме?  
— Өтірікті қуалап, ереміз,  
Үкіметке,  
Айтпай бетке,  
Жалған ақпар береміз!  
Ұят деп санайсың ба?  
Әлде, жалайсың ба?  
— Жалаймын...  
— Жалайсың ба?  
— Ия, жалауға жараймын!

...Рахатқа сөйтіп, батқанда,  
Отырып, бұғып,  
Саусақтарын сұғып.  
«Мм!» — деп жалап жатқанда,  
Әкім келді, қарады,  
Ол қолын салып,  
Өліп, талып,  
Алақанын жалады...  
Сосын, сот келді,  
Сот емес, от келді,  
Ол да шашын тарлады,  
Басқаны алаңдатып,  
Тілін саландатып,  
Қайта—қайта жалады...

Одан кейін анау жетті,  
Артынша, мынау жетті,  
Фин полдың өзі қорқытып,  
Жата қалып, жалай кетті!  
Жалмауыз десем оларды,  
Бұны өзi қалай кетті?  
Мастьта үн жоқ,  
Ал, тесік шелекте,  
Сізге айран керек пе?  
Кешіріңіз, дым жоқ...

Ақмарал ӘБДІРАМАНОВА

Мұхтар ШЕРІМ.

# ШЫМКЕНТШЕ ҮЙЛЕНУ

Үйде құлағын емес, вацапын шұқылап отырған Айнұрға құрбасы Сәуле келді. «Осылай да, осылай, шымкенттегі бір кафеге жігіттер шақырып жатыр. Көңіл көтеріп қайтайық!» деп қыңқылдап қоймады. Құрбасының қыңқылын да, ыңқылын да білетін Айнұр анасынан сұранып, жинала бастады.

— Жігітім бар ғой, деді Айнұр.  
— Ойй, қызғаншақ па, не?  
— Жақында үйленеміз деп шешті.  
— Менің жігітімді көруге барасың.  
— Өзің ұнатсаң болды емес пе?  
— Маған бәрі ұнай береді. Бектайды ұнаттым, махаббатпен ұрып, құлаттым, Бекжанды ұнаттым, оны да жылаттым, Сапарды ұнаттым, махаббатымды ұрлаттым... Енді мына Манарбекті сынап берші.

— Бойы қандай?  
— Кнопка.  
— Ойы қандай?  
— Данышпан.  
— Арақ іше ме?  
— Айран ғана ішемін деді.  
— Темекі тарта ма?  
— Түгіннен қорқады екен.  
— Нашакор емес пе?  
— Құдай сактасын!  
— Қыздарға көп бара ма?  
— Ондайды ұнатпайды екен.  
— Ауру ма, не?  
— Туу, сен де... әзіліңді қойшы.  
— Бопты.  
— Қандай көйлегінді киесің?  
— Жігітім Талғаттың ұнатқан көйлегін киемін.  
— Қандай иіс су себесің?

— Жігітім ұнатқан иіс суды...  
— Туу, Талғат, Талғат деп қалдың ғой. Қай жері артық соның?  
— Маған деген махаббаты.  
— Ойй, махаббатқа қарамау керек, машинасы бар ма, байдын баласы ма, дүкендері жұмыс істеп тұр ма? Депутат па әкесі, осы жағына қарау керек қазір.  
— Екеуі үйден шыққанда, кеш батып қалған еді. Олар кафеде ұзақ отырды. Жігіттер де тым сыпайы көрінді. Ішті, жеді, биледі. Бір кезде Айнұр:  
— Қайтайық, деді.  
— Тағы бір ән айтайық? деп қоймады жігіттердің бірі.  
— Қайтайық?  
— Мына шараптан ішіп, байқайық?  
— Мен ішпеймін ғой  
— Онда сені тістеймін ғой, деп әзілдеді кара торы келген жігіт.

Кафеден шыққан соң құрбасы: «Көліктері бар, үйіне апарып тастайды», деді. Шынымен сенді қрбысына. Бірақ, құрбасы қатырды. Шопыр жігіт қаладан шығып, қала шетіндегі «Забадам» ауылына қарай тартты.

— Қайда барамыз? деп сұрады Айнұр Сапарәлиева.  
— Бензин құйып алайық деп едік...  
Олар бензин құйған жоқ, тіке туыстарымен, көршілерімен күтіп отырған үйге келіп тірелді. Сол екен, жігіттер алып қашып келген қызды сүйреп түсіріп, үйге кіргізді. Айнұр құрбасына қарап еді, ол теріс айналды. Қарауға бет жоқ. Енді Айнұр қулыққа көше бастады. Өз еркімен босаға аттап, төрге жал етіп отыра кетті. Жігіттің женгелері беттерін шымшысты. Женгелердің бірі ақ жаулықты басына жаба беріп еді, күлімсіреген қыз:  
— Менің жігітім бар, деді.

— Бәріміздің де қос қостан жігітіміз болған, деді женгелер жамырап.  
— Менің күйеуім болмақ жігіт қайсы? деп сұрады Айнұр.  
— Бұйырса, мен... деп мінгірледі кара торы жігіт.  
— Мен жігітімнен жүктімін... Ала бересің бе? деп сұрады Айнұр өтірік айтып. Жұрт ішектерін тартты. Женгелер ернін тістеледі, біреулері сағыз шайнап кетті.  
— Өтірік айтып отыр! деп қалды біреу.  
— Жок, шын айтамын. Ағаларымды, жігітімді шақырайын. Жақында үйлену тойымыз болады. Мына жігітті соттақанда не табамыз? Пендешілікпен мені алып қашты. Құрбамның сценаріі бойынша. Апа, балаңыз басқа біреумен бақытты болсын! Не көп, қыздар көп қой, апа, деген бойжеткен, болмай қалған енесіне қарап сөйледі.  
— Оның үстіне екі миллион кредитім бар, деп соқты ол. Мұны естігенде, енесі есінен танып қала жаздады. Атасының аузы ашылып қалды. Жұрттың аптығы басылып қалды. Осылай, жігіттің махаббаты шашылып қалды... Кешікпей Айнұрдың жігіті, ағалары келіп, бірақ шу шығармады. Ақылды қыздың арқасында жігіт те сотталмады.  
Айтайын дегенім, «Шымкентше үйленетін» жігіттер көп. Қолы жетпеген соң, алып қашады. Бұл адам ұрлау, адам құқығына қол салу болып табылады. Өрімдей жігіттер сотталып жатады. Айнұрдың ақылмен жасаған тірлігі құптарлық екен. Ол қазір өз жігітімен қосылып, бақытты өмір сүріп жатыр. Қыз алып қашқан жігіт те, өз теңін тауыпты. Қыз алып қашпандар, жігіттер, қызды махаббатпен майыстырыңдар!

Сыбайлас жемқорлықпен күресті басты бағдар етіп алған «Айқын» газетінің «Ара» қосымшасы Nur Otan партиясының қолдауымен жарыққа шықты.

